

大乘寶要義論卷第六

宋契三藏朝散大夫誠鴻臚少卿傳梵大師法護等奉詔譯

如寶積經云假使滿三界中一切有情是諸有情各各造立如來塔廟如是色相一一高顯猶如須彌山王而諸有情經於苑伽沙數劫中各各尊重供養是塔若有不離一切智心菩薩但置一華而爲供養此獲福蘊勝前福蘊其數倍多彼經又云假使三千大千世界一切有情悉住大乘而復皆成轉輪聖王設以香油如大海水積燃燈草等須彌量各各燃是廣大燈明供養如來所有塔廟若有出家菩薩取燃燈草投少分油於佛塔前燃燈供養此獲福蘊倍勝於前燈明布施百分不及一乃至烏波尼殺曇分亦不及一又若彼諸轉輪聖王各於佛及苾芻衆所普施一

切受用樂具若有出家菩薩以自持鉢所乞之食先減施人然後自食此獲福蘊勝前福蘊最上廣大又若彼諸轉輪聖王積以妙衣如須彌量普施佛及諸苾芻衆若有出家菩薩但以三衣或施十信心菩薩或施佛及諸苾芻衆或施如來塔廟之中此獲福蘊比前所施極爲殊勝又若彼諸轉輪聖王一一皆以滿閻浮提布設妙華廣爲供養如來塔廟若有出家菩薩下至但取一華供養如來塔廟者此獲福蘊比前所施百分不及一乃至烏波尼殺曇分亦不及一次第出生經云當觀菩薩有其四種賢善稱讚應於如來勤供養何等爲四一者自作最上布施供養令他有情亦如是作供養勝行二者勤誠供養諸如來已轉復堅固大菩提心三者現前瞻觀

三十二種大丈夫相四者種植善根而得增勝此等四法是爲最上承事供養諸佛如來海慧問經云佛言海慧有三種最上承事供養如來之法何等爲三一者發生大菩提心二者攝受如來正法三者廣爲有情起大悲心此等是爲勝義供養之行慈氏師子吼經云無佛可想無佛可觀何況有佛可供養耶有所得者無有是處此中何等是供養佛所謂眞供養者應起無想無相之心若無心心所作意無佛想無法想無衆想無補特伽羅想無自他想如是供養者是眞供養諸佛如來般若波羅蜜多經云佛言天主假使苑伽沙數世界之中積滿如來舍利置於利幢之上若有人書寫般若波羅蜜多經俱爲獻施汝於二分之一中當取何分帝釋白佛言世尊

我於此二分之一中當取般若波羅蜜多分何以故般若能生如來舍利故若有供養修習般若波羅蜜多者是即供養如來舍利佛言帝釋若諸有情信解如來如實涅槃者極爲難得此中何等是諸如來如實涅槃無數經中作如是說如來與顯經云佛言佛子若諸菩薩樂欲了知諸佛如來大涅槃者以慧觀察先當了知法自性性法自性者謂即眞如實際法界虛空界自性清淨際無相際我自性際一切法自性如如涅槃應如是了知如來如實涅槃何以故佛子諸法本來如是無生無所生若法本來如是無生無所生是故無有少法可得然佛如來有所生者但爲有情喜樂相續乃有生故如來入涅槃者亦爲有情厭倦生故而實如來本無所生亦無涅槃

是諸如來常住法界佛子譬如日輪光明出現普徧照耀一切世界各於清淨水器之中見日光影亦非日輪徧一切處隨入器中乃有所現若復彼清淨水器或破壞時或渾濁時或減少時彼日光明而悉不見然日光影雖於器中而不顯現非日之咎以彼淨器自破壞故佛子如來亦復如是法界日輪廣大光明從法界中常所出現普徧照耀隨順一切世間若諸有情清淨心相續如來即爲出現影像一切有情雖常覩見如來日輪影像亦非如來徧一切處隨爲出現若復有情如彼壞器不清淨心相續業煩惱覆故不見如來日光影像彼諸有情即起如來入涅槃想然以如來入涅槃者非如來咎但爲有情相續善根有破壞故又復應以大涅槃法所

星八

十三

可化度諸有情故是故如來現入涅槃而實如來無來無去亦無所住佛子譬如一切世間悉作火事或復後時別異聚落國土城邑火事息滅且非普盡一切世間火事皆息佛子如來亦復如是普盡一切世界隨順施作一切佛事若餘佛刹中作佛事已現入涅槃亦非一切世界諸佛悉入涅槃如巧幻師善學幻法諸明呪力而悉洞曉於一切三千大千世界中普現其身作諸幻事一切聚落國土城邑悉徧顯示隨其幻力若住一劫若過一劫若餘聚落或城邑中作幻事已隱自身相亦非一切世間幻事皆隱佛子如來亦復如是以無量如幻之智善學方便勝慧智明示現一切法界幻事如來隨現然如來身畢竟安住法界及虛空界一切有情平等事業

別別刹土隨順作已示現涅槃亦非一佛刹
中入涅槃故一切法界如來悉入涅槃佛子
諸有菩薩應如是知諸佛如來大涅槃故所
知無量畢竟無著法界無邊亦復無中如虛
空界自性廣大真如無生而亦無滅安住實

星八

十四

際然以方便隨時示現是故當知一切世間
勿生疲厭隨先行願而自安住一切世間一
切刹土成辦所有諸勝法行般若波羅蜜多
經云大涅槃者所謂自性空妙法蓮華經云
佛言迦葉若能覺了彼一切法平等之性是
大涅槃彼經又云佛言善男子如來諸所作
事而皆作已成佛已來極甚久遠壽命無量
如來常住不入涅槃爲度有情故示現涅槃
何以故應以如是緣成熟有情故大悲經云
佛言大梵如是此世業盡煩惱盡苦盡苦緣

息滅寂然出離此說是爲涅槃大梵此中無
復有人了是涅槃謂業煩惱盡自性清淨出
世品云諸佛方便開示無邊涅槃之法梵王
問經云梵王白佛言世尊諸出家者於隨所
樂一切相中若能止息此說是爲涅槃佛言

大梵此互爲緣所成立故覺智方廣經云佛
言大目乾連過去有佛號名稱高顯彼佛刹
中唯聲聞衆是時有一苾芻名等觀諸所緣
住大乘行是人曾於無量俱胝那庾多佛所
種植善根於阿耨多羅三藐三菩提心曾無
退轉安住無上大乘法中欲令嚴淨不可說
不可說佛刹其佛刹中無別有情發菩提心
是時彼苾芻雖廣植善根然於甚深法中生
輕慢心以是緣故當生長壽天時名稱高顯
如來如其所應作佛事已即時普觀一切佛

星八

十五

刹何等刹中有情不作佛事還自觀見我刹
土中有一苾芻住大乘行是菩提器然彼苾
芻有障難事以生長壽夭故彼之身器不能
堪任令其種植菩提善根是人命終之後當
墮阿鼻大地獄中亦復不能堪任種植菩提
善根地獄出已生於人中而復聾瘂諸有所
作舉手示物或假他緣方曉其事是時名稱
高顯如來爲欲化度彼苾芻故以善方便於
六十俱胝那庾多生中捍勞忍苦作諸化事
使令成熟佛言大目乾連汝且觀彼如來大
悲心故爲一有情經如是時受其勞苦乃至
彼苾芻機緣成熟安住不退轉地大目乾連
於汝意云何彼時名稱高顯如來者豈異人
乎即現一切義如來是彼等觀諸所緣苾芻
者即無量光如來是父子合集經先行品云

佛言妙吉祥彼過去世輪迴之中無量阿僧
祇不思議無等比無初際時有如來名曰帝
幢經于苑伽沙數等世界佛刹是諸佛刹中
諸有情類皆悉得其五種樂事或有有情得
其欲樂或得出離樂或得禪定樂或得三摩
地樂或得阿耨多羅三藐三菩提樂而彼有
情雖受諸樂然無繫著譬如飛鳥騰翔空中
而得自在在彼諸有情受樂亦然悉無所著妙
吉祥白佛言世尊彼時帝幢如來者即我世
尊釋迦牟尼佛是入楞伽經頌云
星八
我不觀寂靜 亦不起行相 復無分別心
十六
故我證涅槃
此中當知於一乘信解極爲難得此一乘者
而諸經中皆作是說妙法蓮華經云我發起
一乘爲有情說法所謂佛乘無二無三十方

一切世界法爾如是何以故若過去世十方一切世界諸佛如來皆發起一乘爲有情說法若未來世十方一切世界諸佛如來亦發起一乘爲有情說法若今現在十方一切世界諸佛如來復發起一乘爲有情說法所謂佛乘以是緣故十方世界尚無二乘而可建立何況有三真實品云佛言妙吉祥由昔因中一乘境界能具足故今佛刹中唯一乘法而爲出離而無聲聞緣覺二乘建立何以故如來已離種種想故若有人言如來或說大乘之法或說緣覺乘或說聲聞乘者是人於如來所起不清淨心不平等心取著之心大悲經云佛言我若說有種種想者即於法中自生諂曲然我爲諸有情所說諸法皆悉令於菩提樂欲得大乘法一切智攝使諸有情

同到一切智智之地是故無彼諸乘分位而可建立亦無諸地我所建立亦不建立補特伽羅事亦無少行及無量行之所建立復無三乘而可分別彼無分別性入法界門但爲世俗諦故開示引導方便宣說勝義諦中唯一乘法而無有二般若波羅蜜多經云佛言天主若諸天子未發阿耨多羅三藐三菩提心者我當令發阿耨多羅三藐三菩提心若復不能決定發菩提心者我亦當令隨喜發於阿耨多羅三藐三菩提心何以故彼於生死流中相續不斷故我意不欲令彼諸善根分有所隱沒當令於彼最勝法中而有所得大集會品云一乘普攝彼一切乘以其一乘攝諸乘故同歸一理普入法界無分別性總持自在王問經云佛不說有種種之想然佛

出世諸所作事悉同一味法界而無障礙容
受一切有情自成正覺已復令諸有情而亦
覺了然後轉妙法輪所謂不退轉輪譬如治
寶之師於其實所但取假色琉璃先以灰水
磨泮令潔次用黑膩之髮而復治之然其實
師曾無疲倦後以肉汁及以繒帛重復磨治
又用大藥汁及細妙衣次第精治然後瑩潔
去其假色同真琉璃如來亦復如是知有情
界本不清淨乃爲宣說無常苦無我不淨之
法令於輪迴起厭離想後以聖法調伏方便
開導如來亦不暫生疲倦後爲宣說空無相
無願之法令其開覺如來之眼如來亦不暫
生疲倦後爲宣說不退轉輪及說三輪清淨
引導有情令入如來境界之中平等超越種
種因性咸證如來清淨法性此說是爲世間

究竟得無上果阿惟越致經云不退轉輪平
等故諸佛說法亦平等是故如來爲下劣信
解諸有情類不能解了一乘法故乃出娑婆
世界五濁時中以善方便爲彼有情建立佛
事使成佛果勝鬘師子吼經云諸佛如來方
便宣說此涅槃法從三乘中出生諸乘然由
一乘之法取證阿耨多羅三藐三菩提入楞
伽經云諸煩惱種子入三摩地三摩鉢底如
實覺了住無漏界復入聲聞緣覺無漏界中
出世勝行圓滿成辦得不思議法身自在如
來爲所化有情成諸善行故以善方便說種
種乘是故諸如來於種種界中非但說三乘
亦說餘乘法

大乘寶要義論卷第六

